



UNIVERSITÄTS-
BIBLIOTHEK
PADERBORN

Universitätsbibliothek Paderborn

Conciliorvm Omnivm Generalivm Et Provincialivm Collectio Regia

Ab anno DLIII. ad annum DLXXVII.

Parisiis, 1644

Concilivm Parisiense IV. In Qvo Pappoli Episcopi Carnotensis causa suscepta est aduersus Promotum, qui in castro Dunensi episcopus fuerat constitutus, celebratum in sancti Petri basilica, sub die ...

urn:nbn:de:hbz:466:1-15324

ANNO
CHRISTI
573.

1^a CONCILIVM PARISIENSE IV.

IN QVO PAPPOLI EPISCOPI CARNOTENSIS
causa suscepta est aduersus Promotum, qui in castro
Dunensi episcopus fuerat constitutus, celebratum in
sancti Petri basilica, sub die ^o III. Idus Septembris, in-
dictione VI. anno Christi DLXXIII. Benedicti papæ I.
Chilperici & fratrum regum XII.

TENOR SVGGESTIONIS LIBELLI
SYNODO OBLATI A PAPPOLO EPISCOPO.

*Domnis semper suis, atque apostolica dignitate colendis, omnibus
episcopis qui in sancta Synodo nunc Parisius conuenerunt,
Pappolus Carnotinæ ciuitatis episcopus
humilis vester.*

IT A nos canonica institutio admonet, vt quotiens aliqua
Lexortæ fuerint in ecclesia causæ, synodali hoc conuen-
tu debeat publicari. Ideo, piissimi domni, in vestræ pieta-
tis notitia hæc quæ contra nos gesta sunt, per præsentis li-
belli nostri tenorem studuimus deferendum. Ergo cum
me ante aliquod temporis clericorum vel ciuium Car-
notinæ ciuitatis voluntas per consensum, cum conniuen-
tia etiam metropolitani mei, fieri episcopum elegisset,
quod annuente Domino factum est, post aliquot dies,
quidam ex ipsius ciuitatis Carnotinæ territorio presbyter,
nomine Promotus, qui reliquerat sine literis antecessoris
mei cellulam suam, inlicita præsumptione parochiam
meam, cui vocabulum est Duno, quasi sub nomine epi-
scopatus visus est peruasisse. Etiam & facultaticulam ec-
clesiæ, cui præesse videor, quantum in ipso pago esse con-
stat, nescio per cuius ordinationem, simili conditione per-
uasit. Pro qua re supplex vester sanctitati vestræ suggero,
& per Spiritum sanctum, qui in vobis habitat, & diem iu-
dicii futurum, & per remissionem peccatorum, vobis
domnis meis coniuro, vt hoc ita, qualiter vobis fieri non
vultis, emendari iubeatis: quatenus nec per callidam præ-
sumptionem quis audeat in postmodum per tumorem su-
perbiæ similia perpetrare, & similtas ecclesiæ, vestro stu-

dio & ordinatione, iam Christo propitio conquiescat.

Cuius suggestione Synodus sancta, spiritali fauore & canonico ritu respondens, hæc contra temerarios scripsit oblata.

CONSTITVTIO SYNODI

AD ÆGIDIVM EPISCOPVM RHEMENSEM,

qui Promotum in Dunensi castro episcopum
temere consecratur.

Domino suo, atque beatissimo & meritis apostolico fratri, Aegidio episcopo, Philippus, Sapaudus, Priscus, Constitutus, Laban, Felix, Germanus, Lucretius, item Felix, Clementinus, Syagrius, Optatus, Gallomagnus, Salonijs, Quinidius, item Salonijs, Sagittarius, Promotus, Genesius, Polemius, Amacharius, Hesybius, Palladius, Silvester, Victor, Pappolus, Claudianus, Heraclius, Tetradius, Licerius, Leudobaudis, & Desiderius, episcopi, nec non Launoueus presbyter.

DVM pro causis publicis, priuatorumque querelis Parisius moraremur, vir apostolicus frater noster dominus Pappolus episcopus mediocritati nostræ detulit in querelam, in castro Dunensi, parochia denique Carnotina, quod castrum nec ad territorium ciuitatis vestræ, nec ad vestram prouinciam manifestum est pertinere, a vobis contra omnem rationem & contra canonicam disciplinam episcopum consecratum. Et licet secundum prisca beatissimorum patrum decreta potuit huiusmodi excessus in vestra iniuria acerbius coerceri; sed nos caritatis iura seruantes, beatitudini vestræ indicamus, vt presbyterum ipsum, nomine Promotum, qui ommissa seueritate canonica a vobis dicitur tam temere consecratus, vt iuste debeat de gradus ipsius dignitate deponi, sicut Canonum constituta sanxerunt, ad vos euocetis, vel vobiscum retineatis, vt iniuriam nec ecclesiæ, nec sacerdoti suo vltius debeat inrogare. Et quia a fratre vestro domno Germano episcopo, ad petitionem domni Constituti metropolitani, vt ad Synodum venire deberet, est præsentanea inuitatione communitus, quod quoque dominum Constitutum, & dominum Germanum constat in Synodum retulisse, & ad Synodum venire distulit. Idcirco nouerit beatitudo vestra, hoc apud vniuersum præsentem tempore

ANNO
CHRISTI
573.

Concilium constitutum, vt si memoratus presbyter, aut propria contumacia, aut cuiuscumque potestatis assentatione, in prædicta Dunensi ecclesia præsumpserit sub huius subrepti honoris argumentatione ulterius residere, vel res ecclesiæ ipsius amplius vsurpare, aut altaria benedicere, infantes confirmare, vel ordinationes per quascumque parochias facere, aut episcopo suo fratri vestro domno Pappolo resistere praua intentione præsumpserit, ab omni cœtu episcoporum, vel a communionis consortio, perpetuo anathemate feriat: & frater noster domnus Pappolus episcopus, vel ecclesia Carnotina, parochias quas hucusque habuit sub sua ordinatione, debeat auxiliante Domino gubernare. Statuentes etiam, vt quicumque de populo illo benedictionem memorati Promoti presbyteri, post hoc editum manifestatum vel publicatum, aut expetierit, aut accipere contentus fuerit, a communionis consortio, vel ab ecclesiæ liminibus arceatur. Data constitutio die III. Iduum Septembrium, anno XII. regum domnorum nostrorum, indictione VI. Parisius.

SVBSCRIPTIONES.

- Philippus in Christi nomine Viennensis ecclesiæ episcopus hanc constitutionem nostram subscripsi.
 Sapaudus in Christi nomine episcopus ecclesiæ Arelatensis hanc constitutionem nostram relegi & subscripsi.
 Priscus in Christi nomine episcopus ecclesiæ Lugdunensis constitutionem nostram relegi & subscripsi.
 Constitutus in Christi nomine episcopus ecclesiæ Senonicæ constitutionem nostram relegi & subscripsi.
 Laban peccator ecclesiæ Elosanæ consensi.
 Felix in Christi nomine episcopus ecclesiæ Bituricæ constitutionem nostram subscripsi.
 Germanus peccator, etsi indignus, in Christi nomine episcopus ecclesiæ Parisiacæ, constitutionem nostram relegi & subscripsi.
 Lucretius, ac si peccator, in Christi nomine episcopus ecclesiæ Denis constitutionem nostram subscripsi.
 Item Felix, ac si peccator, in Christi nomine episcopus ecclesiæ Namneticæ constitutionem nostram subscripsi.
 Clementinus in Christi nomine episcopus ecclesiæ Aptensis constitutionem nostram subscripsi.
 Syagrius in Christi nomine Æduorum episcopus constitutionem nostram subscripsi.

- Optatus in Christi nomine Antipolitanæ ecclesiæ episcopus constitutionem nostram subscripsi.
- Gallomagnus in Christi nomine episcopus ecclesiæ Treassinæ constitutionem nostram subscripsi.
- Salonius in Christi nomine episcopus ciuitatis Genauenſium constitutionem nostram relegi & subscripsi.
- Quinidius in Christi nomine episcopus ecclesiæ Vafensis constitutionem nostram relegi & subscripsi.
- Item Salonius in Christi nomine episcopus ecclesiæ Ebredunensis constitutionem nostram relegi & subscripsi.
- Sagittarius in Christi nomine episcopus ecclesiæ Vappicensis constitutionem nostram subscripsi.
- Promotus in Christi nomine episcopus ecclesiæ Glannatinæ constitutionem nostram relegi & subscripsi.
- Genesius in Christi nomine episcopus ecclesiæ Segestericæ constitutionem nostram subscripsi.
- Polemius in Christi nomine episcopus ecclesiæ Agennensis constitutionem nostram subscripsi.
- Aunacharius in Dei nomine episcopus ecclesiæ Autifiodorensis constitutionem nostram subscripsi.
- Hesy chius in Christi nomine episcopus ecclesiæ Gratianopolitanæ constitutionem nostram subscripsi.
- Palladius in Christi nomine episcopus ecclesiæ Sanctonicæ constitutionem nostram subscripsi.
- Silueſter in Christi nomine episcopus ciuitatis ecclesiæ Vefontiensis constitutionem nostram subscripsi.
- Victor in Christi nomine episcopus ecclesiæ Tricastinæ constitutionem nostram relegi & subscripsi.
- Pappolus in Christi nomine episcopus ecclesiæ Lingonicæ constitutionem nostram relegi & subscripsi.
- Claudianus in Christi nomine episcopus ecclesiæ Regensis constitutionem nostram relegi & subscripsi.
- Heraclius in Christi nomine episcopus ecclesiæ Diniensis constitutionem nostram relegi & subscripsi.
- Tetradius in Christi nomine episcopus ecclesiæ Vendascensis constitutionem nostram subscripsi.
- Licerius in Christi nomine episcopus ecclesiæ Eloronensis constitutionem nostram relegi & subscripsi.
- Leudobaudis peccator ecclesiæ Sagenſis subscripsi.
- Deſiderius episcopus ecclesiæ Telonenſis constitutionem nostram relegi & subscripsi.
- Launoueus presbyter, in vicem Ricomeri Aurelianorum episcopi, constitutionem nostram subscripsi.
- Subſcripta conſtitutio in baſilica domni Petri, indiſtione ſupraſcripta, Parisius.*

EPISTOLA SYNODI EIVSDEM

AD SIGIBERTVM REGEM,
 vt Promoti causam non defendat.

Domino gloriosissimo, atque sanctæ ecclesiæ catholicæ filio, Sigiberto regi, Sapaudus, Philippus, Priscus, Constitutus, Laban, Felix, item Felix, Germanus, Lucretius, Clementinus, Syagrius, Gallomagnus, Optatus, Salonius, item Salonius, Quinidus, Promotus, Silvester, Genesius, Polemius, Palladius, Victor, Sagittarius, Amacharius, Hesyebius, Claudianus, Desiderius, Heraclius, Tetradius, Pappolus, Licerius, & Leudobaudis, episcopi.

QUANTVM ineffabili gaudio synodali Concilio nuntiatur, quandoquidem a catholico principe res nova pro dilectione Christi concipitur; tantum lamentabile execrandumque censetur, cum in ecclesia sancta contra Deum, & contra Canonum disciplinam dissensio generatur. Nuper etenim non absque conniuentia gloriæ vestræ, sicut credimus, euocati Parisius venientes, novam inauditamque ordinationem in castro Dunensi, parochia denique Carnotina, factam fuisse cognouimus. Quam rem licet vix credere possumus cum consensu gloriæ vestræ fieri potuisse; tamen si cuiuscumque praua suggestione præuenti, in hac tam obscœna & ecclesiæ vniuersæ contraria consensistis, ab huiusmodi scandali defensione sinceritatis vestræ conscientiam expietis: quia satius est, vt ille qui ambitionis instinctu rem tam nefariam dolosa ambitione competiit, per satisfactionem poenitentiae reatum suum abluere compellatur, quam vestra puritas (quod auertat diuinitas) huius facinoris contagione maculetur. Et quia nobis necesse fuit, vt iuxta Canonum constituta personæ temerariæ deberet præsumptio coerceri; ideo salutis obsequium digno in Christo officiositatis & reuerentiæ cultu præbentes, poscimus, vt vos, quos Deus & culmine præcipuos, & sinceritate præclaros esse præcepit, non quocumque, aut quorumcumque temerario consilio ad defendenda huiusmodi scandala misceatis: quia Deum sufficit nosse, nos nequaquam penitus velle contra vos diuinam iracundiam promoueri. Annis

multis gloriam regni vestri potentia diuina cum omni felicitate conferuet, domne gloriosissime, & præcellen-
tissime domne.

ANNO
CHRISTI
575.

SVBSCRIPTIONES.

Venerator vester Sapaudus episcopus salutare præsumo.
Humilis vester Philippus reuerenter audeo salutare.
Humilis vester Priscus reuerenter audeo salutare.
Humilis vester Constitutus reuerenter salutare præsumo.
Laban peccator salutare præsumo.
Humilis vester Felix audeo salutare.
Item Felix humilis vester audeo salutare.
Germanus peccator, proprius vester, etsi præsumptiosus, audeo salutare, & supplico, vt non despicias suggestionem sacerdotum.
Lucretius venerator vester humiliter saluto.
Clementinus venerator vester humiliter saluto.
Syagrius humilis vester reuerenter salutare præsumo.
Gallomagnus humilis vester reuerenter salutare præsumo.
Optatus humilis vester reuerenter saluto.
Salonius vester reuerenter saluto.
Item Salonius humilis vester debita reuerentia salutare præsumo.
Quinidius humilis vester saluto.
Promotus humilis vester seruienter saluto.
Siluester humilis vester reuerenter saluto.
Genesius humilis vester reuerenter saluto.
Polemius peccator, & humilis vester, reuerenter saluto.
Palladius peccator reuerenter saluto.
Victor peccator reuerenter salutare præsumo.
Sagittarius humilis vester reuerenter saluto.
Aunacharius humilis vester reuerenter saluto.
Hefychius cliens & humilis vester reuerenter audeo salutare.
Claudianus episcopus humilis vester salutare præsumo.
Desiderius episcopus humilis vester salutare præsumo.
Pappolus humilis vester salutare præsumo.
Heraclius peccator humilis vester salutare præsumo.
Tetradius peccator reuerenter salutare præsumo.
Licerius peccator reuerenter saluto.
Leudobaudis peccator subscripsi.

Data epistola sub die III. Iduum Septembrium, anno XII. regum domnorum nostrorum, Parisius.

NOTÆ IACOBI SIRMONDI
SOCIETATIS IESV.

¹ *Concilium Parisense.*] Id ipsum videtur, cuius a Gregorio Turonensi lib. 4. cap. 41. fit mentio his verbis: *Cum autem*, inquit,

con-

ANNO
CHRISTI
573.

*contentio inter Guntramnum & Sigebertum reges verteretur, Guntram-
nus rex apud Parisios omnes episcopos regni sui congregat, ut inter utros-
que, quid veritas haberet, edicerent. &c.*

² III. *Idus Septembris, indictione VI.*] Anno Christi 573. Indictio-
num olim apud Romanos, & apud Gallos, diuersum fuit exor-
dium. Romani enim cum reliqua Italia, sicut & Græci, nouas
indictiones inchoabant a Calendis Septembris, quod in Gregorii
magni, Ioannis VIII. & Gregorii VII. epistolis obseruare est. Verbi
gratia, Gregorii VII. epistola 19. lib. 1. Rodulfo Duci Sueuiæ da-
ta dicitur *Capua Kalendis Septembris, indictione incipiente 12.* &
apud Paulum diaconum de gestis Longobardorum capite 25. *Al-
boinus Italiam ingressus indictione ingrediente 3. tertio Nonas Se-
ptembris.* Galli vero priscam & veram, vt fama est, indictionum ori-
ginem retinentes, earum exordium ducebant ex die 8. Kalendas
Octobris. Vnde in capitularibus Caroli Calui, coronatus is dici-
tur Metis in regno Lotharii 5. *Idus Septembris, anno Christi 869.*
indictione 2. nondum mutata scilicet indictione, quæ alioqui nu-
meranda erat 3. si ex Kalendis Septembris Romano more fuisset
inchoata. Eodemque modo Ludouici Balbi extat diploma pro Hu-
gone abbate sancti Martini, Trevis datum anno 878. *Nonis Septem-
bris, indictione 11. non 12.* Sic igitur & hoc loco, indictio 6. quæ Idus
Septembres antecedit, more Gallico intelligenda est, non noua, sed
cuius pauci adhuc restabant dies, vsque ad 8. Kalendas Octobris, an-
no Christi 573. Alioqui si ad methodum Romanam examinetur indi-
ctio, congruet sextæ initium anno 572. Verum hic regum annus erit
non 12. vt est in Synodi subscriptione, sed 11.

³ *Anno 12. regum nostrorum.*] Clotarii regis filiorum, Guntram-
ni, Chilperici, & Sigeberti, Chariberto fratrum maximo iam de-
functo. Horum regni annum 12. congruere anno Christi 573. ex
indictionis 6. nota proxime ostensum est. Idem ex Sigeberti quo-
que regis annis conficitur, quem Gregorius Turonensis lib. 4. ex-
tremo scribit obiisse anno regni 14. eiusque successorem Childe-
bertum filium die natalis coronatum tradit lib. 5. cap. 1. Christi au-
tem annum hunc fuisse 575. ex aliis eiusdem Gregorii locis liqui-
do comprobatur: tum quod cap. 16. eiusdem libri, anno Childeber-
ti secundo pascha narrat die 16. Kalendas Maias celebratum, quod
sine dubio congruit anno 577. tum quod libro 6. cap. 25. idem au-
ctor est, anno Childeberti octauo, pridie Kalendas Februarias diem
incidisse dominicum, quod perinde congruit anno 583. Quare si, vt
ex his patet, anno Christi 575. regum istorum decimus quartus labe-
batur, reliquum est vt duodecimum eorum annum anno 573. com-
petere, regnique eorum exordium ex anno 562. coepisse statuamus,
vt dictum est.

⁴ *Tenor suggestionis.*] In vetere libro scriptum *suggestionis.* atque
ita etiam in epistola Synodi Aruernicæ ad Theodobertum regem:
Deo placente suggestionis consulimus. & in Concilio V. Aurelianensi
capite 7. *plurimorum suggestionis comperimus.*

Concil. Tom. 12.

Vuuu

NOTA SEVERINI BINII.

ANNO
CHRISTI
575.Clades Gal-
lia sub Chil-
perico illa-
ta.

^a *Concilium.*] Cum in Gallia bellum civile recrudesceret, Guntramnus rex procurauerat vt Parisiis Concilium celebraretur, si forte per sanctissimos episcopos res absque bello componi posset. Verum vbi semel res armis agi cœpta fuit, ecclesiasticæ leges omnino siliuerunt. Ait enim Gregorius de gestis Francorum lib. 4. cap. 47. & 48. his temporibus accidisse, vt Chilpericus per filium suum Theodobertum Turonensibus, Pictauiensibus, atque aliarum ciuitatum ecclesiis magnam cladem intulerit. Hanc ille paucis perstringens, sic ait: *Vastat, euertit, ecclesias incendit, ministeria detrahit, clericos interficit, monasteria virorum deiicit, puellas deludit, & cuncta deuastat: fuitque illo tempore peior in ecclesiis gemitus, quam tempore persecutoris Diocletiani.* Vide Baronium anno 576.

EPISTOLA SANCTI GERMANI
EPISCOPI PARISIORVM
AD BRÛNICHILDEM REGINAM.

Vt Sigebertum regem reuocet a consilio belli, quod fratri suo inferebat.

Dominæ clementissimæ atque præcellentissimæ, & nobis semper piissimæ dominæ, & in Christo sanctæ ecclesiæ filiæ, Brunechildi reginæ Germanus peccator.

1. Cor. 6.

QUIA caritas congaudet veritati, & omnia sustinet, & nunquam excidit; propterea ex contribulato corde, & ex intima animi dilectione audemus vobis suggerere. Quia eo tempore, quando minor erat numerus populi Christiani, & cum Dei auxilio licebat residere quietum, cum apostolis dicebant: *Ecce nunc tempus acceptabile, ecce nunc dies salutis.* Nunc e contrario tam funestos & luctuosos ante oculos habentes dies, flenter dicimus: *Ecce dies tribulationis & perditionis nostræ adueniunt.* Væ nobis, quia peccauimus. Si nos istæ non conterruissent amaritudines & tribulationes, & corpori exhibuissent infirmitatem, per nosmetipsos vestræ debuimus occurrere pietati. Quia si fas dici est, singulariter & vestri dilectionem in nostro gestamus pectore, & vnice de vestra presentia spiritali desiderio sitiētes, sicut cultores & peculiare filii Dei, ambien-